



CATAT SEJARAH: Encik Ahmad dan Cik Amalina ditawar tempat ke Sekolah Perubatan Yong Loo Lin di NUS.

Dari madrasah ke poly, kini ke NUS ikuti pengajian perubatan

DUA lulusan madrasah yang memilih laluan politeknik mencipta sejarah apabila ditawarkan tempat di Sekolah Perubatan Yong Loo Lin, Universiti Nasional Singapura (NUS) baru-baru ini.

Encik Ahmad Abdurrahman Hanifah Marican, 20 tahun, lulusan Madrasah Aljunied Al-Islamiah, ialah pelajar cemerlang kursus Diploma Sains Bioperubatan daripada Politeknik Singapura.

Lulusan Politeknik Temasek, Cik Amalina Ridzuan, 22 tahun, pula bekas pelajar Madrasah Al-Maarif Al-Islamiah yang meraih

Pingat Emas Sysmex Asia Pacific bagi kursus Diploma Sains Bioperubatan.

Tahun lalu, lulusan sains bioperubatan Politeknik Republic, Cik Noor Ahmed Alkaff, merupakan pelajar politeknik Melayu pertama diterima masuk ke Fakulti Perubatan NUS.

Mengulas pencapaian ini, Cik Noor berkata: "Saya teruja kerana kejayaan mereka menunjukkan bahawa latar belakang pengajian bukan hambatan asal kijta bermotivasi berusaha."

Laporan lanjut di Muka 4.

LULUSAN MADRASAH MASUK JURUSAN PERUBATAN NUS MELALUI POLITEKNIK

Minat dalam biologi dorong cita-cita jadi doktor



ENCIK AHMAD: Masuk bidang perubatan NUS hasil minat, kerja keras dan sentiasa memberikan yang terbaik. – Foto JOHARI RAHMAT

► **HARIANTO DIMAN**
mdhari@sph.com.sg

BERMULA dengan pendidikan madrasah, kemudian ke politeknik dan kini menempah tempat melanjutkan pelajaran dalam bidang perubatan di Universiti Nasional Singapura (NUS).

Encik Ahmad Abdurrahman Hanifah Marican berupaya mendaki tangga pendidikan ini kerana minat, kerja keras dan sentiasa berusaha memberi yang terbaik.

Menurut beliau, minatnya terhadap tubuh manusia bertambah semasa mengikuti kelas Biologi di menengah tiga dan empat, dan ini mendorongnya melanjutkan pelajaran dalam bidang sains bio-perubatan di Politeknik Singapura (SP).

Dengan tekad dan kerja keras untuk terus maju dalam bidang itu, beliau berjaya meraih keputusan cemerlang dengan Gred Pura-ta Mata (GPA) 3.94 dan kini mendapat tempat dalam kursus perubatan di Sekolah Perubatan Yong Loo Lin di NUS.

“Saya tidak sangka lulus temu bual dan ujian bagi permohonan mengikuti kursus perubatan itu.

“Semasa sesi temu bual, ramai pemohon datang daripada maktab rendah dan kelihatan penuh keyakinan. Saya rasa seperti tidak setanding dengan mereka.

“Namun, saya berikan yang terbaik dan tunjukkan bahawa saya juga aktif dalam aspek lain seperti kerja kemasyarakatan di samping pencapaian akademik,” kata Encik Ahmad, 20 tahun.

Walau tidak menanam cita-cita menjadi seorang doktor pada awalnya, beliau berpanduan prinsip ‘hidup untuk belajar’ dan ingin menimba ilmu sebanyak mungkin.

Perjalanan meraih keputusan cemerlang dan menempah tempat dalam jurusan perubatan di NUS itu tidak mudah.

Beliau melalui pendidikan di Madrasah Aljunied Al-Islamiah dari darjah satu hingga menengah empat.

Encik Ahmad mengaku mengalami sedikit kejutan budaya apabila memasuki pendidikan sekular di SP.

“Pada mulanya saya memang tidak biasa dengan suasana sekolah sekular dengan semua rakan sekolah bebas bergaul tetapi lama-kelamaan saya dapat sesuaikan diri, mula rasa selesa dan lebih terdedah kepada masyarakat lain.

“Rakan dan pensyarah saya semuanya peramah dan memberi sokongan sepenuhnya. Mujur, saya biasa mengambil banyak mata pelajaran semasa di madrasah dan dapat mengimbangi masa antara akademik dengan kegiatan luar darjah di SP.

“Pendidikan di madrasah juga telah menyediakan saya dari segi menghafal dan memahami isi pelajaran dengan cepat,” ujar Encik Ahmad, anak kedua daripada empat beradik.

Walau ramai rakan madrasahnya melanjutkan pelajaran dalam pengajian Islam, pihak madrasah, rakan dan keluarganya banyak menyokong beliau meneruskan minat dalam bidang biologi.

Bapanya seorang peniaga dan ibunya seorang pendidik.

Encik Ahmad berkata beliau memutuskan memilih kursus perubatan semasa mengikuti program bekerja sambil belajar (internship) di Hospital Khoo Teck Puat (KTPH).

Dalam satu kes, beliau membantu menenangkan seorang pesakit leukemia yang dalam kesakitan semasa menjalani ujian pengambilan sampel tulang sumsum. Dengan memegang erat tangannya, pesakit itu mula tenang.

Daripada pengalaman itu, beliau mahu membantu mengurangkan penderitaan pesakit menerusi pengetahuan yang dipelajari.

“Saya suka lakukan kerja kemasyarakatan dan telah menyertai banyak kegiatan luar darjah yang berkaitan dengan kerja ini,” ujarnya.

Beliau pernah menyertai program ‘Berkawan Dengan Pesakit’ bersama Institut Kesihatan Mental (IMH) dan Hospital Tan Tock Seng (TTS) dengan menghabiskan masa menemani pesakit dan pernah bantu menjalankan latihan pemeriksaan kesihatan bagi warga emas di kawasan Bishan bersama kumpulan National Healthcare Group (NHG).

Encik Ahmad juga aktif mengajurkan acara bersama kelab budaya Melayu di SP yang memberinya peluang mengongsikan pengetahuan mengenai agama Islam bersama rakan-rakannya.

“Saya masih terkejut dengan berita saya dapat tempat dalam kursus perubatan di NUS. Banyak persediaan telah dilakukan sebagai sebahagian daripada proses permohonan kursus itu. Saya memang tidak sabar untuk mulakan pelajaran di sana,” katanya.

Nasihatnya kepada pelajar: tidak kira latar belakang pendidikan, asalkan ada niat dan ketekunan, peluang berjaya sentiasa terbuka.

Encik Ahmad bakal menjalani perkhidmatan negara (NS) dulu dan kemudian menangguhnya buat sementara bagi memulakan kursus perubatannya pada Ogos tahun depan.

TIADA YANG MUSTAHIL: Lulusan madrasah dan politeknik, Cik Amalina Ridzuan, akur kerja keras dan keyakinan diri membantunya mencapai impian ke Sekolah Perubatan Yong Loo Lin, NUS. — Foto ihsan AMALINA RIDZUAN



Tidak putus asa jadi doktor walau pernah gagal

► **HARYANI ISMAIL**
haryani@sph.com.sg

PERALIHAN Cik Amalina Ridzuan dari Madrasah Al-Maarif Al-Islamiah ke Maktab Rendah Serangoon enam tahun lalu didorong cita-citanya sejak kecil mahu menjadi doktor.

Namun, keputusan Sijil Am Pelajaran (GCE) Peringkat ‘A’-nya yang kurang memuaskan membuatkannya patah semangat dan terasa tiada harapan menjadi siswi perubatan.

Namun, gadis cekal berusia 22 tahun ini meletakkan harapan mencapai cita-citanya suatu hari kelak meneruskan laluan politeknik dengan mengambil kursus Diploma Sains Bio-perubatan di Politeknik Temasek (TP).

Bak pucuk dicita, ulam mendatang, harapannya menjadi semakin nyata dengan berita baik baru-baru ini.

Segala kesangsian tentang keupayaan menjadi doktor yang menyelinap di hati Cik Amalina mampu dilenyapkan dengan beliau ditawarkan tempat di Sekolah Perubatan Yong Loo Lin, Universiti Nasional Singapura (NUS).

Beliau antara dua pelajar madrasah setempat yang beralih ke politeknik dan kemudian menerima tawaran ke jurusan perubatan, tahun ini.

Selain itu, pelajar Melayu pertama dari laluan politeknik yang masuk ke Fakulti Perubatan NUS tahun lalu ialah Cik Noor Ahmed Alkaff daripada Politeknik Republic.

Sementara itu, Cik Amalina juga ditawarkan kursus ijazah sains biologikal (dengan pengkhususan biologi kimia) di Universiti Teknologi Nanyang (NTU).

Pada Rabu ini pula, beliau akan menerima Pingat Emas Sysmex Asia Pacific dan Hadiah Persatuan Ahli Biokimia Klinikal Singapura (SACB) di majlis tamat pengajian Politeknik Temasek kerana muncul sebagai pelajar cemerlang kursusnya.

Ketika dihubungi, Cik Amalina, anak sulung lima beradik, berkata:

“Saya bagaikan bermimpi. Kadangkala, timbul bisikan hati bahawa peluang tipis bagi pelajar politeknik memasuki bidang perubatan. Maka saya mencari cabang pengajian lain yang boleh diceburi di universiti. Bagaimanapun, saya bersyukur dan teruja dengan tawaran ke NUS.”

Pengajian menyeluruh di TP meliputi penglibatan dalam program kajian kebezaan serta program kepimpinan pelajar yang membawa nyata ke ekspedisi luar negara, mencorak keyakinan dirinya agar keluar daripada zon keselesaan.

Penekanan pada proses menimba ilmu di madrasah dengan setiap pelajar mengambil belasan subjek turut membantunya fokus dan membahagikan masa.

Ibuanya, Cik Rabiah Sulaiman, 44 tahun, pegawai penyokong pengurusan di agensi air negara PUB turut menjadi sumber inspirasi.

Dalam kesibukan menyara kehidupan keluarga, Cik Rabiah mengikuti pengajian Diploma Pentadbiran Perniagaan secara sambilan di Politeknik Singapura. Beliau lulus tahun lalu.

“Ibu kerja keras dan selalu mencari cara merealisasikan impian saya. Melihat kesungguhannya membuatkan saya bersemangat setiap kali diuji dengan cabaran hidup,” jelasnya lagi.